

郵政局特准掛號認爲新聞紙類

中華民國五年八月二十

湖南政報處發行長沙小吳門吟章代印

第 〇〇四九 號

# 湖南政報

## △本報價目

本報按照陽曆每日出報一本

外埠每份月加郵費大洋二角

夫役送報如有遺漏請函告以便查究

一每份每月收回大洋六角

現因紙價昂貴不敷開支每份每月暫加二角

一零售每本銅元四枚 暫加一枚

目錄

大總統電令

公電

程總司令取消總司令部電

咨

兼代省長咨教育部賚送私立會通法政學校法律別科補習第一班履歷成績表請查核備案由

呈

民政廳呈覆奉飭查明湘陰李知事被控各條毫無實據請毋庸置議由

委任令

民政廳令委陳光漢充醴陵磁業公司監察員由

民政廳令委瞿燮署理桂陽縣知事由

民政廳令委唐虞署理岳陽縣知事由

民政廳令委劉向日署理常德縣知事由

民政廳令委陶志浚署理沅陵縣知事由

飭

財政廳會飭兩縣事西林圍新股民

易鍾嶽等稟控平糶等侵蝕朦混一案

仰會同委員逐款查辦詳覆由

通告一則

大總統電令

本月二十四日爲前大總統安葬之期業令參酌中外典章擬定喪葬禮節追懷前績愴悼彌深特派蔭昌前往致祭以昭崇典此令

陸防軍隊向由農商部管轄軍興以來不無變更此後仍應劃清權限陸軍歸督軍管轄警備巡防各營隊以專責成而資整頓此令

農商部呈京城區內槍器行用期限現屆期滿擬請延長四個月至本年十二月三十一日止自民國六年一月一日起改用新器自應暫行照准仍著該部趕製新器以便行用此令

陸軍總長段祺瑞呈請將甘家傑授爲陸軍騎兵少校應照准此令  
右八月十九日電

### ▲公電

程總司令取銷總司令部通電

雲南唐督軍肇慶岑都司令陸督軍重慶蔡督軍貴陽劉督軍廣西陳督軍成都羅護督暨各軍司令北京上海各報館鑒大盜移國滇黔樹義撻伐既張逆焰旋息潛一介武夫又在奔亡國變初興淪夷是懼不揣謏劣勉致驅馳一入國門投身戎旅仰承莫公策以重任招撫湖湘閒關深入收有靖寶檢飭師旅又辱撫軍長都司令眷佑殷拳許其總戎以圖大克受命以來夙夜祇懼材幹負重殞越是虞嗣藉義軍聲威俾得逐湯湘於以復袁死湯去初願竟償歸田有志解甲可期徒以湘政仍棼擾亂未息遽棄責職必遺鉅累今茲大局粗定戰事早息譚公督湘衆於有賴必能明其政刑造福桑梓潛爲軍人服從命令爲吾天職謹於八月十八日將護國軍總司令自行取銷所部軍隊力事縮小範圍報國無力服農有願行當棄甲言歸以抑愆尤諸公領袖時碩同興義師我行我志不敢不陳雲天在望景依長勞崇高之誨企不吝惠

程潛叩

# 咨

湖南省長公署咨

爲咨請事案據湖南民政廳廳長吳嘉瑞詳稱案查接管卷內據私立會通法政專門學校校長趙恒詳稱竊本校法律別科補習第一班係於民國四年五月開始補習共計回校學生一百七十一名曾於是年七月十七日將學生姓名開講日期每週課程及畢業期限詳請咨准復於十二月以該班補習期滿詳請於十二月二十日起二十二日止舉行畢業考試是月十四日奉准沈前使批示各在案本校遵即如期分門局試所有該班此次補習畢業各科試卷均由各教員分門校閱平定分數前僅彙造補習學科成績暨一覽表詳覽鈞署當奉沈前使批開該班原甲班生賓仕莊等十一名乙班生楊齊賢等十二名丙班生唐士進等五名既因事未與畢業試驗應准降入第二班補習至已試驗之姚承會等一百四十二名如果各學科分數確能及格自應准其畢業惟核閱所賚畢業成績表僅以補習公司條例等六門分數與操行分數平均計算按之學生學業成績考查規程第十條畢業成績評定法實不相符雖據稱補習科目與前修科目截然不同自應將歷年所習不同之學科分別計算不容強爲牽合仰卽遵照定章將各學生每學科成績分數相加以學年數除之爲各學科畢業成績分數再將各學科畢業成績之總分數以學科數除之得平均數爲畢業總平均分數以分數之等差核列等第另造畢業履歷成績表一覽表內畢業總平均分數亦應一一照改賚請核咨勿延此繳表發還等因奉此本校復將該班各生歷年成績暨補習成績遵照定章辦理改造履歷成績表暨一覽表計得原甲班補習畢業生林金鑑等四十八名乙班補習畢業生謝祖智等三十八名丙班補習畢業生陳國翰等五十六名合計補習第一班畢業生一百四十二名具

文詳費鈞署察核轉咨 教育部核准飭遵深爲公便再甲班第一第二各學年操行分數係照前清學部章程歸入人倫道德學科內計算已於民國四年二月十八日詳費甲乙丙三班成績表案內聲叙故此次仍未另列又此次所賣各班成績表民法商法內所分各門分數均經查照原有分數合算平均未便另行分列合併聲明等情據此查該班原甲班生賓仕莊等十一名乙班生楊濟賢等十二名丙班生唐士進等五名既因事未與畢業試驗自應准予降入第二班補習至此次考列甲等林金鑑等十九名乙等劉苾等七十七名丙等周霽光等四十六名查該各科分數尙無不合似可准予一體畢業理合檢同賣件詳請轉咨核覆等情據此本省長覆查無異相應咨請 貴部查核施行此咨

教育部總長

計咨送表本

湖南兼代省長劉人熙

湖南省  
長之印

中華民國五年八月十九日

# 呈

湖南民政廳呈第 號


爲呈覆事案奉 鈞署指令第四八號內開案據湘陰戴振球等三十七人呈稱爲公懇澈究事竊民邑知事李介春籍隸安徽爲亡清之舊官吏挾其牢籠手段趨附權貴要結劣紳藉以自固權位置一切政治於不顧盤踞湘陰六載毫無建設而一班無賴薰心權利亦不保全桑梓甘心助虐朋比爲奸肆行無忌種種離奇之事實層見迭出不堪枚舉曾經民邑公正士紳鍾忠陳嘉祐彭熙治徐光模等三十餘人臚列條款諷爲傀儡於陰歷六月六日開全縣大會集議到會者二百餘人公同表決欲將該署澈底澄清一洗從前積弊詎該知事寡廉鮮耻恬不注意猶復多方運動依然戀棧民等以事關桑梓不忍緘默茲特舉其顯而易見之劣迹爲我省長剴切陳之一濫用私人一科科長李贊廷其胞弟也收發陳同和其妻姪也隨丁李祝山王子林高松喬輩其親信爪牙也在外狐假虎威慣行撞騙屢被稟控毫不過問一寵用號房號房本不足輕重之賤役該知事寵用極惡之危菊階操縱一切鄉民愚懦慣受詐欺望門投止而不行賄者即凌辱之凡遇尋常案件極少必索取規費二三串不等故該號房一赤貧無賴子不數年而家至巨富其凶惡可知一巧取民財該知事不知法律爲何物所有案件概由一班私人運動受人賄賂強勝弱敗不惜枉法埋冤以故違法執行案件不服上訴者不知凡幾近年假長子完娶愛女贅壻爲名肆行騷擾士紳餽送重金則喜形於色並暗囑羽翼到處招搖下而至於飯店棧房茶館羅夫警兵雜投亦各攤送錢數百至三五串不等卽此一端其平日貪鄙成性可概見也至於徵收驗契公錢局情弊極多業經合邑公推邑紳常瑩等切實檢查茲不瑣瀆一吸食洋煙該知事素有煙癖聞未戒除觀其平日放棄職務午前不能

起牀每一訴案擱置月餘不批積壓半年不結人謂其深染亡清官吏積習現仍吸食洋煙不爲無因應請照章抽驗以重煙禁一摧殘教育民邑原有小學一百三十餘校自該知事蒞任以來匪惟不實力提倡且將原有之學校摧殘現僅存四十餘校其貽害於吾邑後進人才誠非淺鮮一違背共和該知事當籌安會發起時即首先通電致賀電文爲君憲立國薄海歡騰謹率士民同伸慶祝等語對於黃陂繼位湘省獨立并不懸旗慶祝且將電文有傷袁逆之語藉電碼不明爲名全行刪去其背叛共和甘心附逆實情顯著一騷擾地方當湘省獨立時軍事緊急以民邑首當其衝該知事運夫輿夫既不預備於前復敢擄掠於後縱使警備隊四處騷擾以致軍隊所過地點商棄交易農輟耕耘老少婦女惶恐尤甚甚有敲詐不遂該警兵即拳足交加哀我小民何罪至此尤可惡者當湘省獨立以後該知事故事張皇倡首遷徙將自己眷屬及重要箱篋搬運回皖派隊數十名護送下河以致城鄉居民極形惶恐亂象頻生幸有大軍鎮懾免遭大亂現值共和恢復政治刷新民邑何辜久留此怨聲載道直同傀儡之長官以禍人民也爲此公懇省長台前賞准立予澈究以懲官邪而蘇民困謹呈等情據此除批據稟各情是否屬實仰候令行民政廳查明核辦此批等因掛發外合就令行令到該廳即便遵照辦理此令等因奉此本廳查湘陰縣知事李介春係前清宣統三年閏六月到任迄今六年民國服官最久莫如該員則其勤政愛民輿情浹洽已可概見且前此湯督出走之後湘政更新之時該縣正紳慮知事有所更調函稟紛來堅請留任所陳政績良堪嘉尚洵爲湘省不可多得之員况查戴振球等所控各條或於政體無關或係故爲羅織言之故甚其詞按之毫無實據難保非少數人民挾嫌具控以快其私現當考察吏治之時賢如該員似未便因流言之中遽易生手該民等稟懇澈究之處應請毋庸置議如再續稟并請 鈞長從嚴批斥以維



賢良而做刁告所有遵飭查覆緣由是否有當理合呈請 鈞署俯賜察核批示祇遵謹呈  
湖南督軍兼省長劉

民政廳廳長吳嘉瑞



中華民國五年八月十九日

 委任令

湖南民政廳委任令

令醴陵磁業公司監察員陳先漢

案查醴陵磁業公司原係官商合辦定章設監察二人由主管官署委派一人商股股東推舉一人此項監察人員職務亟關重要非具有專門學識不能勝任查該員學驗宏富堪以委充斯職除令行原任監察員沈鏊暨該公司知照外合行令委爲此令仰該員即便遵照前赴醴陵磁業公司按照定章暨現行公司條例執行監察職務毋負委任此令

民政廳廳長吳嘉瑞

湖南民政廳印

中華民國五年八月十八日

湖南民政廳委任令

令署理桂陽縣知事瞿燮

案照桂陽縣知事陳思材調省遺缺亟應遴員往署查有瞿燮才具開展堪以委任業經呈奉省長核示除分別咨行外合行令委到該員即便遵照迅速馳赴該縣接印視事務須實心任職毋負委任仍將到任日期暨接收交代情形連同履歷通報查考此令

民政廳廳長吳嘉瑞

湖南民政廳印

中華民國五年八月十九日  
湖南民政廳委任令第 號

令署理岳陽縣知事唐虞

案照岳陽縣知事李鎮湘調省遺缺亟應遴員往署查有唐虞才具開展堪以委任業經呈奉省長核示除分別咨行外合行令委到該員即便遵照迅速馳赴該縣接印視事務須實心任職毋負委任仍將到任日期暨接收交代情形連同履歷通報查考此飭

民政廳廳長吳嘉瑞

湖南民政廳印

中華民國五年八月十九日

湖南民政廳委任令

令署理常德縣知事劉向日

案照常德縣知事杜毓賢調省遺缺亟應遴員往署查有劉向日才具開展堪以委任業經呈奉省長核示除分別咨行外合行令委到該員即便遵照迅速馳赴該縣接印視事務須實心任職毋負委任仍將到任日期暨接收交代情形連同履歷通報查考此令

民政廳廳長吳嘉瑞

湖南民政廳印


中華民國五年八月十九日

湖南民政廳委任令

令署理沅陵縣知事陶忠浚

案照沅陵縣知事翟熊書辭職遺缺亟應遴員往署查有陶忠浚才具開展堪以委任業經呈奉省長核示除分別咨行外合行令委令到該員即便遵照迅速馳赴該縣接印視事務須實心任職毋負委任仍將到任日期暨接收交代情形連同履歷通報查考此令

湖南民政廳廳長吳嘉瑞



中華民國五年八月十九日

# ○ 飭

湖南財政廳會飭

爲飭知事案奉 督軍兼省長一百二十九號飭開案據西林圍新股民代表易鍾嶽等稟稱緣湘陰益陰兩縣交界之西林各圍潰廢日久無力修復民國元年各院老業民公議砍畝招修辦法有章本芳奉前農務總會委任總理其事章卸事後又舉饒運鈞接辦因股款難籌請陳其忠招股坐辦於是收入長沙部分股款錢二十餘萬串益陽部分股款錢一十餘萬串局內一切事務均由李拱之夏耀崑劉開甲三人經理另借財政廳公穀一萬陸千石該堤工始行蕙事旋陳病故饒亦放棄李等擅專辦理至民國四年已獲秋收李等又收庄錢二萬餘串租穀九千餘石毫未分給民等各股份出入帳目無數可稽偽造總報銷四十一萬六千九百串朦蔽湘益兩縣存案然浮開浮報姑不具論而查其實在收入股款共四十三萬有奇此外另借官穀及租穀庄錢等項其數甚鉅總計實數約五十餘萬串自報僅四十一萬六千餘串而所存之數毫無著落又從前所發土夫之局票不知其萬數亦未清兌所借之官穀復未清償額項騙欺向論不理且膽敢將堤內公田擅行盜賣得金肥已終日營營現猶未已他如砍畝於堤工告成自應稟官清丈計田畝之若干按用費之多少分高低之品價均勻支配方昭平允乃李等竟不經官發照自立證券私刊鈐記任意指點胡亂填給有密切關係者則給以膏腴無私相授受者則概分磽瘠況於一形之田重發數倍之券種種強橫莫敢抵抗刻值新收不遠李等仍將逞其故智不顧公理始終把持害於胡底若不急於清釐則估踞高田者坐得租李等便於中取利而任分低畝者空繳堤費誠恐將來釀成巨禍不已爲此公懇察核


賞准迅委專員駐院督收本年租穀清算歷年帳目切實丈量均勻支配發給印照以儆弊混而重賦命不勝感泐所有民等要求辦法六條另粘於後等情據此除批示據呈已悉仰候行民政財政兩廳會同查核辦理此批粘單抄發分行外爲此飭仰該廳長即便會同核議轉飭遵照等因奉此查易鍾嶽等所稟修復西林園會招股款借領公穀因經理局務李拱之等侵蝕朦混以致輾轉叢生不可收拾業經本廳會同飭委周樹杰前往查辦在案爲此飭仰該知事即會該委員逐款查明詳候核轉此飭

財政廳廳長袁家普

民政廳廳長吳嘉瑞

右飭湘陰縣知事

准此



中華民國五年八月日

# 通告

高等審判廳刑庭公開及書面審判案件日時通告

本廳刑庭公開審判案件如左

二十一日 一控訴人黃宗藩對於長沙地審廳就該控訴人竊盜之所爲第一審判決不服

控訴一案（宣判）

二十二日 一呈訴人何力田等對於呈訴唐鶴樓等威逼致死一案（公開審理）

二十三日 一控訴人李啓松對於常德地審廳就該控訴人誣告之所爲第一審判決不服

控訴一案（公開審理）

二十四日 一控訴人吳桐量對於長沙地審廳就該控訴人侵佔之所爲第一審判決不服

控訴一案（公開審理）

二十五日 一大理院發還更審陳紹丞偽造一案（公開審理）